

十五家詞

冊三

十五家集

欽定四庫全書

十五家詞卷十三

休寧孫默編

尤侗百末詞下

中調

臨江仙

午日

庭砌香蒲一翦綠
紗窗梅雨瀟瀟鬧
粧兒女綵絲飄
珠簾桃葉渡
畫鼓木蘭橈
喚起湘纍休競渡
雲旗游戲波濤江潭獨醒轉無聊
古人應讓我飲酒讀離騷

擬辛稼軒

搔首問天天不語
光陰無計消磨挑燈看劍自摩挲
澆胸冷熱酒拍手短長歌
遮莫英雄老去也山林經濟如何
平章重事到煙波
鏡吹傳玉鴨水戰教金鵝
玉鴨蛙名

又

少日揮戈兼躍馬
錦裘風雪行邊十年回首鬢蕭然
蹇驢花下路短笠渡頭船
憑寄壯心歌舞地綠樽翠袖紅絃不然散髮事金仙
蒲團香影裏橫槊自參

禪

蝶戀花

弔返生香

彤管不隨春夢度留與人間啼哭相思句一本青編
紅淚註離魂縮入香奩住 髣髴真真紙上語爲雨
爲雲飄渺無憑據行到吳江楓落處自攜一葉歸家
去

一翦梅

夜落金錢花

曉風殘月過三生風裏呈身月下歸魂自憐薄命六
銖輕憔悴黃裙冷落紅塵 一家姊妹兩般分夜合
隨君夜落隨君春光真不值分文雖有錢神難買花
神

和李易安韻

織錦機邊蟋蟀秋萬里江風吹送郎舟空閨無處說
相思獨夜鳴琴西北高樓 彈罷清商兩淚流妾自
傷心君亦多愁雁魚消息幾時來纔望雲頭又候潮
頭

好女兒

佳人

一捻脂紅百和香濃半醉嬌聲半醒態在坐髀鬟雲
步搖佩玉臥曲鞦弓斜睇檀郎不語誰慣汝漫留
儂問此處不留何處去道朝上秦樓晚游洛浦夜宿
巫峯

泥美人

彼美人兮半面風姿誰向粧臺描五色有顧愴傳神
何郎傳粉張敞修眉可憐紅顏黃土立而望是耶
非問若個小名君識否是罷舞西施停歌子夜不笑
褒姬

漁家傲

漁父

天下滔滔皆是也風波滿地江河假鼓棹行歌君莫
訝誰知者離騷莊子吾其亞一尺篷舟雙槳打綠
蓑青笠人如畫潑刺黃魚穿柳掛收綸罷提壺閒共
樵夫話

春閨

夢鎖重樓春信杳彩絲偷把花魂釣籠內鸚哥沒緊
要頻嘶叫牆角海棠誰折了左右懶粧和悶倒上
裙嚬子驚人跳作怪鴉頭扯謊報才郎到愁眉錯對
菱花笑

定風波

納涼

不着衣衫不掃粧天邊趙盾逼人忙安得芳姿乞作
婢喚至手將團扇扇王郎却羨摩訶池上路行去
花梢口吸露珠涼攜手歸來竹簟睡枕臂玉魚吐出
口脂香

蘇幕遮

塞上二首

朔雲寒邊月苦霽栗西風吹亂黃沙舞夜半雪深三
尺許氈帳駝峯倒載琵琶女打圍來圈地去銀管
炊煙茶煮烏羊乳蠻府參軍窮塞主匹馬隨他看射
南山虎

塞垣長寒信早畫角鳴鳴吹破霜天曉一陣哀鴻殘
月小夢繞南雲淚溼征衫老拄青山吟白草燕雀
排衙公事彈琴了又報黃旗前隊到手板匆匆走馬
遼西道

風中柳

和孫夫人韻

郎上長安怎好說些煩惱但叮嚀馬蹄芳草自來月
下把淚痕偷告夢兒中教郎知道一紙家書不覺

低鬟微笑報平安歸期尚杳金釵翠鳳送香車須早
怕春去燕殘鶯老

行香子

春暮

紫陌金車綠浦蘭槎共追尋大地芳華三分春色分
與誰家有一分山一分水一分花 雨打簷牙月落
窗紗恨韶光轉盼天涯小庭寂寞底事爭譁是一聲
鶯一聲燕一聲鴉

江城子

春思

花朝去了又春分草如茵柳煙新油壁青驄爭踏武
陵春繡幙羅衣香過處人不見插紅裙長安士女游
春解裙圍繞名爲裙幄 紗窗寒雨最難聞冷爐薰
淡芳樽閒病閒愁獨對舊東君日暮捲簾南北望魂
欲化楚山雲

清明旅思

江城佳節也清明喜新晴午風輕寡柳孤桃粧點可
憐生羅襪繡鞋人不見空辜負滿堤青 客游隨分
踏莎行冷旗亭隔花屏無限家山綠水畫舸橫寶馬
雲旗香過處看玉手撥銀箏吳中是日虎丘看會士

千秋歲

感舊用秦少游韻

落花簾外點點殘紅退雲穗亂風箏碎愁拈翡翠管
恨拆鴛鴦帶薄倖煞燕兒難捉鸚哥對夢想瑤臺
會繡被同舟蓋錦字杳遺香在星移銀漢斷雨散巫
峯改魂去也化成精衛填青海

祝英臺近

憶別用稼軒晚春韻

玉爐殘銀燭暗畫楫維前浦黯淡東風早灑淚痕雨
惱他順水艣兒幾株楊柳甚力把征帆拴住空相
覷欲將心事叮嚀題多總難數獨夜思量記起枕邊
語算來萬種春愁妾擔不起分一半與郎隨去

一叢花

游朱氏園亭次鄒程邨韻

江村杳杳半平沙木槿縛籬笆誰引劉郎來洞口隔
牆見人面桃花數曲欄杆幾條書畫也算小山家花
名人面桃主人白髮話煙霞虛閣倚風斜池邊指
點平安竹穀雨近芍藥抽芽新出筍尖舊藏桂子撮
合點清茶

金人捧露盤

盧龍懷古

出長安臨絕塞是盧龍想榆關血戰英雄南山射虎
將軍霹靂吼雕弓大旗落日鳴笳起萬馬秋風問
當年人安在流水咽古城空看雨拋金鎖苔紅健兒
白髮閒驅黃雀野田中參軍岸幘戍樓上獨數飛鴻
最高樓

漫興

拋官去乞得小山居偃仰此生餘何用食爲十斛麥
未之學也五車書時還讀亦已種則何如待討个
漁童名便了再配个樵青名大好賽赤脚勝長鬚奴
更養奴千樹橘婢還釣婢百頭魚挈山妻同稚子且
相於

驀山溪

夏興

登樓極目又見斜陽下遠近兩三峯一點點翠眉如
畫鶯簧蟬鼓楊柳舞輕風人閒暇天瀟灑惆悵如何
夜白衣蒼狗閱盡雲真假今古總悠悠嘆舉世塵
埃野馬青天難問搔首且歸來沉醉也高眠罷月上
葡萄架

意難忘

元宵

春色佳哉報吳宮花柳羯鼓方催羽林千騎去華屋
萬家回羅帳地錦衣街燈火上樓臺看滿城星橋高
揭火樹叢開月明車馬如雷有舞旋鮑老歌打洪
崖香塵移畫舫玉燭裊金釵簾幌下影徘徊聽笑語
談諧百忙裏鬪成燈謎擲與郎猜蘇城初撤防兵張
燈甚盛

長調

滿江紅

春閨

玉懶香顏支瘦腕行行立立頓藜枕鷓鴣屏外襯花
茵席行雨夢飛巫峽上隨風笑踏江南陌恨高樓故
故惱人眠吹長笛攬衣起斜陽側臨寶鏡修山額
沾芙蓉粉汗倩郎溫拭羅帶小開錦翡翠雲鬟斜插
金鸞鵲倚香奩一晌晚粧成西窗黑

感遇

我醉欲眠且收了眼光青白分付與死便埋我陶家
之側天下山川吞八九腹中人物容千百任諸君拍
手笑狂生乾坤窄破面鬼焦頭客福建子山東賊

問何人請劍何人投筆我夢化爲蝴蝶舞醉來敲碎
珊瑚缺歎一腔熱血灑何時青衫溼

生日自題小影二首

鑄錯難成空贏得頭顱如許君不見此中有鬼英雄
無主世事夢迴關塞月文章浪盡瀟湘雨數茫茫宇
宙此身多無謂處 山岳裏聊容與竹林下方延佇
但看他白眼科頭箕踞背後好遮王導扇手中只少
漁陽鼓攜一杯自祝畫圖前魂相語小像科頭跣足
坐竹林下童子執扇於後

甚矣吾衰誰畫出秋風蒲柳須信道相君之面不過
村叟車蓋鼓吹今夢覺空山晏坐搔童首問何人不
著鷓鴣冠惟君否 且避暑頻揮手謹謝客休開口
祇先生生日歸而謀婦半臂纔更一斗麵百錢恰買
三升酒對此君爛醉仰天眠看蒼狗何后謂明皇曰
不記三郎生日令何忠脫半臂更得一斗麵耶

思隱二首

寄語青山爲我築數椽茅舍更計較鑿斯池也衡門
之下屋後十弓放筍竹牆邊五畝栽桑柘還留些隙
地種梅花依臺榭 北海釣南山射東墅弈西園畫
有隣翁來往雞豚春社笑問老妻能去否蒿簪藜杖

歸休罷但囊中尚乏買山錢從天借

袞袞諸公看朱紫白頭隨駕儘讓與蠅頭蝸角冷杯
殘炙夫子漫勞冉有僕小人請學樊遲稼向深山好
作古田家義皇話 松菊徑瓜藤架麋鹿砦魚蝦
且醉吟高臥及時閒暇稚子浪尋青草鬪老夫合受
黃鸝罵倘城中有客訪吾來關門謝

上巳旅思

天朗風和是昔日蘭亭春社恨不見一時名士烏衣
王謝光祿文章曲水讌子山馬稍華林射到吾徒意
氣向誰人都休罷 四海事歸耕稼五嶽志銷婚嫁
但短衣長鋏棲遲傳舍醉去行歌城闕上醒來坐嘯
牆籬下聽大江滾滾客心悲流日夜

壽余淡心五十用吳梅村先輩韻

對酒當歌君休說麒麟圖畫行樂耳柳枝竹葉風亭
月榭滿目山川汾水雁半頭霜雪燕臺馬問何如變
姓隱吳門吹簫者 蘭亭楔香山社桐江釣華林射
更平章花案秤量詩價作史漫嗤牛馬走詠懷却喜
漁樵話看孟光把盞與眉齊皋橋下

倦游初歸喜顧菴繹堂處實旣庭御之枉集
草堂和韻

梅雨廉纖問昨夜小池微漲漫一笑征衫乍脫故園
無恙翠籜移來石徑側黃鸝啼到桐陰上更村村煙
火起農歌田家餉報有客扁舟漾看滿座蘭亭唱
喜酒徒相對欲傾家釀却暑但揮蟬雀扇登高請進
蒲桃杖向西山指點夏雲生多奇狀

卽席贈顧菴學士

二十年來數世事塵霾波漲喜老友跳歸燕市鬚眉
無恙皂帽幸辭遼海外青衫還泣潯江上問榜門誰
是脫驂人千金餉且上下隨流漾予解和公能唱
須澆開魂壘洞庭春釀屈指明年將半百看雲取次
從藜杖又何勞呵壁續離騷箋天狀顧菴長予一歲
明年五十矣予堂名看雲故用杜句

卽席送繹堂憲副北上并寓都中同好

才子仙舟坐春水泖湖新漲從此去黃河千里布帆
無恙玉殿傳臚原日下金門待詔還天上料長安早
辦文津閣本作他年定有大官廚爲君文津閣本作
卿餉斜日外雕旗漾芳草路驪歌唱送關山牙檠
一樽清釀使客自騎沙苑馬野人獨倚柴門杖倘諸
公問訊僕何如窮愁狀

飛濤祠部辭疾不至東以訊之

太息丁生出塞去雪堆沙漲謝弋者遼東歸鶴令威
無恙浪跡偶來皋廡下端憂却據胡床上正提壺盧
橘滿林黃堪分餉端午後蒲葵漾麥秋至螻蛄唱
君奚爲高臥欲逃村釀遊子渡江不用櫂健兒躍馬
寧須杖劇何堪新婦閉帷中婆娑狀

憶別阮亭儀部兼懷西樵考功湖上

我發蕪城趁競渡一江風漲爲寄語池塘春草阿連
無恙白舫已乘東冶下青驄尚躍西冷上問錢塘可
接廣陵潮雙魚餉采蓮棹湖心漾折柳曲橋頭唱
辦十千兌酒餘杭新釀王子正招緱嶺鶴孫登也策
蘇門杖待歸來贈我兩峯圖空濛狀時阮亭有秦淮
之役西樵與孫無言俱

寄呈荔裳觀察

北望盧龍痛精衛魂填溟漲何幸得南樓老子下官
無恙千里相思風雨夕十年重遇江湖上笑故人祇
有一杯尊爲君餉飛蝶夢游絲漾騎馬地朝雞唱
算半生白髮星星愁釀笠澤煙波宜載酒泰山日觀
聊攜杖再休提宋玉賦秋風悲哉狀

苦雨書悶

積雨東籬雷隱隱水雲時漲休夏好繩床藥臼消磨

微恙讀史喜觀秦楚際詠懷高詒羲皇上笑饑來驅
我走天涯無人餉 愁何許懸旌漾悲未已吹簫唱
怪衆人皆醉覆杯沉釀勘破黃梁道士枕打開白業
瞿曇杖咄何來修竹彈甘蕉紛投狀

顧菴復和八首見示賦此答之并貽旣庭

何物文心筆陣老墨池飛漲賈餘勇吟成八詠撚髭
無恙公子七哀傳鄴下大夫九辨賡江上驚從而和
者曲彌高三練餉 倒詞峽真潢漾短歌闕長歌唱
只江郎才盡渴求杯釀我倦欲投斑竹管公豪任奪
青藜杖問紅箋填得幾多愁難於狀

水調歌頭

贈隱者

左手招明月右手引清流遂棄人間俗事長伴赤松
游春與援兮吟嘯秋與鶴兮飛舞八百歲春秋夜授
南柯守朝拜酒泉侯 攜玉杖吹鐵笛酌金甌醉鄉
高臥掉頭那問帝王州自謂羲皇以上無論晉魏之
事涓子不能傳我亦問津者願泛武陵舟

解嘲

卿自用卿法吾亦愛吾廬一生着幾兩屐安用美哉
車種得東籬五柳飲得東臯五斗此外又何須已夢

我爲蝶誰識子非魚 書咄咄談悶悶解如不如
說鬼妄言妄聽莫辭無人貴及時行樂我也逢場作
戲軟飽黑甜餘勿問九州事且臥一床書

滿庭芳

風雨夜懷卿謀

折絮天風凍花側雨薄寒新上羅衣可憐人意恰對
可憐時幾度思量往事回首處風景淒其難生受黃
昏院落獨自怎支持 想伊人此際籠香弄筆翦燭
吟詩待扁舟相訪夢到還迷只聽數聲歸雁斷雲裏
叫過樓西呼來問又推深夜不肯寄書飛

鳳凰臺上憶吹簫

夢亡友卿謀

玉樹生埋香鉤殉葬人間無限傷心聽山陽隣笛淚
破衣襟長憶連床對酒燈影裏淺笑微吟斯人死坐
看卿輩誰是知音 追尋天邊去也盼十二樓中雁
斷魚沉甚風吹環珮夢倚瑤琴依舊壁人一對攜手
處翠袖花簪應歎我關山搖落髣髴髮蕭森晉人云使
卿輩存斯人死

漢宮春

觀演邯鄲夢

咄咄臨川能現夢中身而爲說法邯鄲道上一枕悲
歡離合青驢黃犬好粧成紅妻綠妾等閒看鬼門關
外何殊洛陽宮闕 休笑盧生癡絕算一場春夢大
家收煞黃梁半甌炊過幾朝年月曲終人醒玳筵前
酒杯猶熱又歸來獨眠孤館今夜應添白髮

聲聲慢

旅思用易安韻

花開柳閉燕去鶯來東君于甚休戚一樣春風二十
四番消息朝來又添細雨大江頭落潮偏急春莫去
縱他鄉暫遇故人曾識 休笑春光已老看鏡裏白
髮數莖堪摘苦把春風留住怎能吹黑空着枕頭一
半聽銅壺淚點同滴這時節便夢中人到也得

夢揚州

客廣陵用少游韻

晚潮收數隨宮花月都休寒雨蕪城綠楊三月如秋
市門十里黃埃滿但往來車馬星稠紅橋畔青樓底
誰人勾當春愁 追想文津閣本作思樊川狎遊報
書記平安廿四橋頭笑我多情鬢絲禪榻空留紗燈
萬點歸何處枉斷腸錦瑟簾鉤平白地揚州夢醒惱
亂蘇州